

摘藻堂四庫全書薈要

集部

欽定四庫全書薈要

聖祖仁皇帝御製文集卷二十八目錄

雜著

書座右四則

讀大學

讀性理大全

跋

皇考世祖章皇帝御書正大光明四字後

恭跋

世祖章皇帝御書陋室銘後

跋資政要覽

跋王右軍書曹娥碑真蹟

跋王羲之快雪時晴帖

跋董其昌書

跋董其昌書

跋董其昌書

書宋榻淳化閣帖後

訓學篇

欽定四庫全書薈要卷一萬三千十

集部

聖祖仁皇帝御製文集卷二十八

雜著

書座右四則

覽本之際不可說閒話不然差錯亦未可知如用人與
刑名錢糧等事關係非小不可不慎

又

無一日不寫字無一日不看書義理自然貫通若畫地

自限豈登高行遠之至意哉

又

時當春今天氣融和萬物發生之時三農布種之日

又

為學之道須功夫嚴密久之其理自昭一段自得之趣
自不能已

讀大學

自古治道盛於唐虞而其所以為治之道即其所以為

學之功後世聖人紹明厥緒以詔來者雖渺然千百載
其大義微言豈有殊指哉大學首言明德新民誠不異
於堯典所言固可因以推論其符合之故而邈其所由
致力之端矣堯典曰克明俊德以親九族九族既睦平
章百姓百姓昭明協和萬邦黎民於變時雍大學之言
明德新民曰格物致知誠意正心修身齊家治國平天
下此所謂先聖後聖若合符節者歟其言克明俊德者
統言之也猶大學言明明德也格物致知誠意正心修

身者分言之也而堯典闕然未明其義蓋嘗以是而求之書曰人心惟危道心惟微惟精惟一允執厥中則其所以致力之端不外是矣夫曰惟危曰惟微則辨之不可不早辨所貴致其知矣曰惟精則格物之謂也知之既極其明則守之貴極其誠曰惟一則誠意之謂也以至正心修身皆主於一而允執厥中之義以全繼此而家齊國治天下平胥於此受裁成焉孰謂十六字之心傳不可以括大學之全書歟朕於帝王修己治人之道

雖日加自勵而未之有得念大學所由致力之端而合之堯典以明其義云

讀性理大全

昔者堯舜以一中相授受禹湯文武周公繼之孔子又繼之祖述憲章大成以集於是言道者莫不折衷於孔子然孔子之言性與天道也雖子貢不得而聞況其下焉者乎孔子之後惟子輿氏首揚性善之旨而仁義充塞其道不行漢之諸儒抱其遺經以誦法孔子然僅窮

六經之義未聞性道之傳也若夫荀卿之言性惡而理
偽揚雄之言性善惡混修其善而為善人修其惡而為
惡人皆與聖人之旨陽合而陰悖雖韓愈之賢謂性有
上中下三品之異亦似指氣質之性而言蓋未得為至
論焉宋儒生於千載之下探索微言紹明墜緒性道之
理始昭然大著於天下今讀其遺書如周子之學以誠
為本以無欺主靜為要二程子之學以主敬致知為先
朱子之學以窮理致知主一居敬為務皆深有得於性

天之旨可以上承夫孔子之傳者也其他諸儒造詣所至或見諸撰述或形諸論說悉能發明先聖之傳默契精微之蘊其有功於斯道非淺鮮矣朕備覽前哲垂著之言手句讀而丹黃之雖研精極慮而於天人性命之旨詎能洞鑒本源歟

跋

皇考世祖章皇帝御書正大光明四字後

世祖章皇帝御筆書正大光明四字結構蒼秀超越古

今仰見

聖神文武精一執中發於揮毫之間光昭日月誠足媲美心傳朕罔不時為欽若敬摹勒石垂諸永久為子孫萬世法康熙十五年正月吉日恭跋

恭跋

世祖章皇帝御書陋室銘後

我

皇考世祖章皇帝以上聖之資撫興王之運躬處九重

心周部屋蓋所謂養其民以致賢人矣至於親簡冊灑翰墨無時而不存此念也今恭覩

御筆書陋室銘一卷陋室者何山間水涯之居詩人之所謂考槃空谷也以萬乘之崇高不忘草茅之卑末於其所居若有取焉而親為書其辭則

聖心之所存於此亦可見焉康熙十六年九月四日萬善殿記

跋資政要覽

右資政要覽三卷

皇考世祖章皇帝機政餘暇博考羣籍萃精獵微

御製成編朕時勤披讀思仰先猷洪惟

皇考曾首出之資開太平之業所以承敘萬年裕我後
嗣子孫無疆之祚者顯謨駿烈非寡昧之所能窺蓋體
具徇齊德兼廣運因心以徇悉合於先程率性而行咸
合乎天則過化存神之妙夫豈有資於效法也者而猶
不廢夫學古之勤稽求之益豈非聖不自聖謙尊而光

者乎予小子欽承手澤念紹庭聞寶此遺文常作蘭臺
之秘陳茲大訓即為西序之珍恭綴片詞用貽來葉云
爾

跋王右軍書曹娥碑真蹟

曹娥碑相傳為晉右軍將軍王羲之得意書今覩真蹟
筆勢清圓秀勁衆美兼備古來楷法之精未有與之匹
者至今千餘年神采生動透出絹素之外朕萬幾餘暇
披玩摹倣覺晉人風味宛在几案間因書數言識之

跋王羲之快雪時晴帖

晉右軍將軍王羲之真蹟存於世者尠矣快雪時晴嘗見刻之搨本中今覩其真蹟可為希代之寶藏之篋衍不時觀閱恍接其人於千載以上也

跋董其昌書

米芾書天馬賦縱橫騫翥前無古人董其昌所臨既得其形似且極游行自如之妙朕嘗愛翫揭之屏風因題數語志真賞焉

跋董其昌書

朕觀昔人墨蹟華亭董其昌書畫錦堂記字體道媚於
晉唐人之中獨出新意製以為屏列諸座右晨夕流覽
寧不遠勝鏤金錯彩者歟

跋董其昌書

此屏裝潢既成尚餘縑素詹事沈荃亦華亭人素學其
昌筆法題跋數語命之續書以志朕意時康熙壬戌二
月八日

書宋搨淳化閣帖後

宋太宗皇帝嘗遣使購歷代君臣書蹟命侍書王著模刻法帖十卷搨以澄心堂紙李廷珪墨大臣登兩府者方得賜焉蓋其重之如此當時本不可多得况歷數百年之後乎此本乃賜翰林學士畢士安者神采煥發波磔明潤漢晉以來翰墨風規宛然猶在者尚賴此帖之存也朕幾政餘閒啓帙披卷如晤往昔心意融洽洵可寶而藏之也

訓學篇

皇初之會惠浸萌生澤及翔泳要其淳風沕穆難得而
稱焉若夫上體乾揆俯育民物尼聖尚嘉之以冠德表
治炳煥於典謨者莫崇乎陶唐有虞氏之為君也其時
肇命中天函光始曜化神通變運啓文明而以禹臯稷
契夔龍數賢聖為之臣亮天工熙帝載矣乃猶君臣咨
嗟動色相倣勞謙恭已兢兢業業休哉帝者之上儀百
王之芳軌也自茲以還或與治同道或與亂同歸未有

不原於敬怠之殊途積漸為安危之異轍者朕研精經籍逖覽往事念欽若之不易天位之維艱沖齡踐阼遂以安生民利天下為心厥後三逆之亂勞我師徒朕於此時憫念吾民罹此荼毒日昃而食中宵不寐階籤警夜軍書刺閨或已就枕披衣而興坐遽達旦凡攻守之難易機宜之遲速地形之險平饋餉之盈詘間諜之虛實物情之真偽羣下之勞苦功能之高下罔不博稽獨運惕若有遺用是四征不悞跣跣剗膊草薶禽獮殲厥

醜類底於廓清茲五年矣四方無事邊境寧謐風行海
表萬里來庭朕固涼德邁茲嘉會可不謂難得之時哉
向使蒙業而安宴然以處三逆者尾大不掉蔓滋難圖
或久而不發發至於大如火燎原不可撲滅乃欲使戍
壘壤境之間芸芸黎蒸耳不聞鳴鏑目不覩金革士旅
無暴露之憂閭井無騷騷之患其可得乎又況能使六
合怡怡羣生就理永無蹊鑿之虞長有恬熙之象乎今
天下既平矣公卿大夫方伯連帥羣有司在官者可以

少息其肩矣孔子繫易曰黃帝堯舜垂衣裳而天下治
又稱舜無為而治比自武功者定上下恪勤興廢祛慝
罔即於逸庶事漸康刑政幾於清簡雖不敢仰追無為
之聖化繼自今以往公卿百寮退食自公將優游有餘
日焉所謂難得之時者非耶朕嘗考漢唐治平之世有
百官休沐之制有令節游宴之詔蘇軾亦謂士大夫捐
親戚離墳墓宣力之餘亦欲取樂此人之至情諸臣際
此休暇之時而有優游之適豈不甚愜於朕懷雖然難

得者時可幸也亦可惕然警也昔漢文帝之賢值承平之日賈生獨以為未安未治者蓋居安思危所以久安已治求治所以長治也朕又觀古先哲王以及名公卿賢士大夫無有不遜志於學者蓋立身之本政治之原莫尚乎學堯則欽明文思舜則濬哲文明立人君之極也禹宅揆契掌教皋陶明刑伯典禮夔典樂立人臣之極也凡能此者其惟學乎朕雖探索羣書積日彌年不自暇逸然而未有所得中心惻然曷敢企望勲華之績


諸臣舍臯夔將以何者為矩矱耶不寧惟是漢世三公
九卿如倪寬公孫弘韋賢貢禹劉向蕭望之匡衡桓榮
楊震之徒並以儒雅尊顯於朝廷凡國有大事則引經
據義歸極於道故漢之政理最為近古逮於唐宋名臣
如林咸本儒術發為事功即程顥程頤朱熹諸賢不得
大用於其時而著書立說羽翼六經至今學者宗之為
世坊表甚矣學之不可已也如此及是時百爾卿士翺
翔乎詩書之苑囿斟酌乎道德之淵源體心踐行率其

子弟寧學而後仕毋仕而後學焉且夫農工商賈必世其業而士夫之子弟若一惰慢遂為平人間有出而仕者少或不學長無所知語及古今之事茫然如墮雲霧又或矜其私智不度奔陋如犢僨轅害斯大矣其不得仕者或飽食美衣冶游嬉戲忽忽過日一旦銷落泊如窮流可不念哉夫學以實本根資通達定經權也未知事親者觀古人之事親而知孝未知事君者觀古人之事君而知忠未知天下之務者觀古人之前言往行而

知守經達變由是作賓王家為國楨幹使振鷺之聲充
庭鴻鸞之羽漸階詎弗美歟朕是以遐溯唐虞鋪觀歷
代取君臣交儆之義以及修身教家之法而為之說云



聖祖仁皇帝御製文集卷二十八



總校官庶吉士臣侍朝

校對官檢討臣王福清

膳錄監生臣宣葆光

欽定四庫全書會要

集部

聖祖仁皇帝御製文集卷二十九至三十一

詳校官原任編修臣徐立綱



欽定四庫全書薈要

聖祖仁皇帝御製文集卷二十九目錄

雜著

書通鑑綱目後

閱皇明祖訓偶書

紀苗事

書蘭亭帖後

讀楚辭



喻馬

連珠

有序

祭文

祭明太祖文

祭至聖先師孔子文

祭元聖周公文

諭祭江南江西總督于成龍文

諭祭江南江西總督于成龍第二道文

欽定四庫全書薈要卷一萬三千十一

集部

聖祖仁皇帝御製文集卷二十九

雜著

書通鑑綱目後

史之作也不惟其備紀載而已將以昭勸懲於萬世自孔子作春秋以明天德以彰王事善善惡惡之間褒貶見焉故其文則史也其抑揚予奪之法卽經也自是而降一代之興必有一代之史皆易編年爲紀傳本末具

於篇中是非備於論贊至司馬光綜括古今爲通鑑一書采獲詳博考据精嚴爲諸史之大成然據事臚列褒貶之義或闕此朱子綱目所以繼春秋而作也然考歷朝正史之外有金履祥通鑑前編以及馬總之通歷宋庠之通譜靡不網羅舊聞多所引證然終不若朱子之綱目爲切要而純正信乎其有功於世道人心非淺鮮也觀其自序之言曰大書以提要分注以備言使詳略同異通貫曉析如指諸掌蓋隱然不敢當筆削之意焉

然其邪正是非之辨賢姦忠佞之分寓大義於微詞紹
素王之心法麟經以後惟有此書朕披讀尋繹弗釋於
懷治天下者其視此爲龜鑑也夫

閱皇明祖訓偶書

朕遐稽載籍近考前朝凡裨治理之書必殫精深之蘊
豈徒以其文焉而愛悅之已哉皇明祖訓一書萃列后
之謨兼衆智之美至於去邪納諫之規勤政慎刑之誠
內而宮闈之禮教外而朝堂之政令胥盡於斯焉迨其

後世子孫漸至於陵替者豈其貽謀之未臧歟由不能
善守之故也朕披覽之際心焉景慕常以爲鑒因書以
記之

紀苗事

王師之平蜀也大破逆賊王平藩於保寧獲苗人三千
皆釋而歸之及進兵滇中吳世璠窮蹙遣苗人濟師以
拒我苗不肯行曰天朝活我恩德至厚我安忍以兵刃
相加遺耶夫苗之獷悍不可以禮義馴束宜若天性然

者一旦感恩懷德不忍輕倍其上有中土人士所未易
能者而苗顧能之是可異也雖然其又何異之有昔有
虞舜羽三苗格姬文因壘崇墉降叔弓禮俘南蒯走荀
吳却叛戴韞拘仲暲遣質莎車來諸葛攻心南人服皆
不事斬艾以恩信相約結而敵人自歸已事具在苗奚
異焉且夫苗其種蠻也其居荒外也而其性則猶然秉
彝好德之人也子輿氏不云乎以力服人者非心服也
力不足也以德服人中心悅而誠服也獨謂苗而異乎

人而不可以德服也耶

書蘭亭帖後

唐文皇嗜蘭亭帖至竭萬乘之力多方以購之又時樞
善本賜其臣僚可謂勤矣而卒無妨於治國理民之政
蓋其納諫受言力行仁義所圖者大舉凡游藝之事不
足以累之况寄心翰墨於幾務之餘豈非前王之令軌哉
推考其時貞觀之風幾與三代比隆其仁心善政可施
於後世者多矣高山在望景行行止寧獨於蘭亭一事

哉

讀楚辭

朕讀屈原書往復不厭豈直以其文辭哉蓋其浩然之
氣畜積鬱勃磅礴激越故其發於咏歌嗟歎之間不能
自己自非實有其忠君愛國繾綣惻怛之誠亦烏能若
此耶是以往復讀之尋其指意之所出而於是乎有取
焉耳昔子輿氏論浩然之氣謂直養無害則塞乎天地
之間若屈原者實有是氣可知矣司馬遷謂可與日月

爭光者豈謬語哉夫其所養如此故其言曰誰能以身
之察察受物之汶汶者乎又安能以皓皓之白而蒙世
之溫蠖乎卒自沉於汨羅信乎其忠也或者乃臆測天
問九章謂其實無沉淵之事士生於千載之下欲懸斷
千載以上之是非蓋已難矣矧並其所行之事以有無
變易其說其好奇失實爲已甚朕所以惡夫輕議古人
者也至如屈子之行昭昭在天壤間者而可沒其實耶

喻馬

伯樂嘗薦九方臯於秦穆公公使行求馬三月而反報之曰已得之矣在沙丘牝而黃使人往取之則牡而驪公以讓伯樂伯樂曰是所相者天機也有貴乎馬者也得其精而忘其粗在其內而忘其外及馬至果天下之馬也是說也吾嘗疑之夫馬之行於地也猶士之用於世也君子之觀人也聽其言然後察其行故曰視其所以觀其所由察其所安其不略乎外而遺其粗也如是世有色物牝牡之不知而可以得善馬者乎是不必納

言試功而可以盡天下之士也非通人之論也且夫千里之馬世不恒有而馬之用不可一日而或缺其上焉者以之備輿衛充十二閑次則供戎事下者亦可以服轅而代步天下固無不可用之馬也使必待遠筋駿才而後用之則利用致遠之道或幾乎絕矣故善相馬者天下無棄馬善相士者天下無棄材嗚呼此器使之方也歟

連珠

有序

朕嘗觀揚雄博綜藝文敘述短章名曰連珠班固賈
逵傳毅諸人相繼有作昔人所謂辭麗言約合於古
詩諷興之義良不虛也效其體作數首以示侍臣雖
亦假物陳義至於託寄高遠殊讓古人爾

蓋聞動靜互宅所以乘陰陽之機張弛咸宜所以體剛
柔之撰是以春溫秋肅四時之玉燭常調山結川融八
柱之金樞永奠

蓋聞海水納其所出故浩大而無涯車輪復其所過故

廣遠而不滯是以善由虛受而萬物歸懷德本健行而
上天合契

蓋聞薦時之士以之應變則乖蹈故之儒以之經方則
拙是以夏蟲不可以語冰而秋蟬不足以知雪

蓋聞上之御下不貴挈瓶之智下之比上必由盈缶之
孚是以教戰以忠非察慧之用救饑以信無匱乏之虞
蓋聞興善察廉朝廷之典安上庇下臣子之忠是以叔
向賀貧在建德以爲本子文逃富不勤民以自封

蓋聞錫爵酬庸必首進賢之典疏勲命秩宜先勸善之
褒是以潞子見拘士伯分田於瓜衍箕師告捷胥臣受
縣於先茅

蓋聞仁義之性不因地而遷移貞白之姿不隨時爲豐
嗇是以蘭蕙生於幽谷不以居僻而損其芳松柏產於
茂林不以歲寒而凋其色

蓋聞律呂迭宣而音以蕭條爲主采章代變而形以寂
寞爲君是以樂主人和非緣鐘鼓之節禮由天秩不傳

玉帛之文

蓋聞舞羽之朝不廢刑章之設畫衣之制實輔禮教之窮是以嚴父之威期於式穀慈母之愛寓於折筭

蓋聞德之所屆靡遠弗周化之所孚無幽不被是以祝網中之飛翮而六合戴其恩蔭樾下之暘人而九州懷其惠

蓋聞吳歆越吟異轉而皆樂荆豔楚舞殊姿而並妍是以五方墳壚咸興謠於堯壤八風燥濕同被化於虞絃

祭文

祭明太祖文

自古歷代帝王繼天立極功德並隆治統道統昭垂奕
世朕君臨海寓運會昇平軫念民生省方問俗途經白
下憑眺鍾山緬憶前徽興言往烈園陵入望瞻封樹之
依然史冊可徵企芳規之儼在儀章式舉殷禮聿稱敬
遣耑官代陳牲帛爰申禋祀之誠用著景行之志冀神
爽其不昧降雲車以格歆

祭至聖先師孔子文

仰惟先師德侔元化聖集大成開萬世之文明樹百王
之儀範永言光烈罔不欽崇朕丕御鴻圖緬懷至道憲
章往哲矩矱前模夕惕朝乾覃精思於六籍居今稽古
期雅化於萬方繄惟典訓之功實勸又安之效茲者巡
省方國至於岱宗瞻望魯邦爰來闕里空堂至止恍聞
絲竹之聲舊寢徘徊喜動宮墻之色車服禮器宛然三
代遺風几杖冊書亶矣千秋盛蹟愜明靈之儼在文治

遐昌肅禋祀以惟虔精忱庶格

祭元聖周公文

惟公丕承聖緒懋叙人倫光烈覲揚成一家之繼述官
禮制作垂萬世之經常道闡圖書探六爻而易貢心傳
精一兼三代以訏謨啓東魯之典型猶存故澤入尼山
之夢寐未墜斯文联稽古省方瞻言至止郊原縱目遙
深松栢之思廟貌崇觀爰切羨牆之慕特申祇薦代以
親蕃惟冀神靈尚克歆饗

諭祭江南江西總督于成龍文

朕惟國家敷治簡賢道先保障人臣奉公奏最節重清
勤苟四知之克嚴歷終身而弗替寵褒宜賁恩卹用昭
爾于成龍志篤醇誠誼敦貞介甫膺民社聿著循聲既
懋旬宣彌彰令績是用畀以節鉞綏乃邦畿爾克撫字
維勤苞苴盡絕迨兩江遷鎮一節罔渝馭下則大革貪
風勵已則寒同儒素雖古廉吏曷以加茲迺倚任方殷
遂溘焉淪逝軫懷良惻異數頻頒嗚呼蕭然官舍竟擔

石之無存煥矣綸章庶泉臺之克慰苾芬在御尚其歆承

諭祭江南江西總督于成龍第二道文

惟爾苦節克貞鞠躬匪懈真一介之弗取越數官而彌堅奄忽云亡能無憫盡嗚呼清風未遠長存表德之思寵卹重頒丕著旌賢之典爾靈不昧其克欽承

聖祖仁皇帝御製文集卷二十九

欽定四庫全書薈要

聖祖仁皇帝御製文集卷三十目錄

賦

春雨賦

梧桐賦

弩賦

并序

夜亮木賦

并序

西苑芙蕖賦

松賦

玉泉賦

行殿讀書賦

并序

竹賦

并序

閼里古檜賦

并序

欽定四庫全書薈要卷一萬三千十二集部

聖祖仁皇帝御製文集卷三十

賦

春雨賦

神籥網緼化機和煦元氣上融醲膏下聚首五行者曰
水潤萬物者惟雨于時蒼祇蒞節青鳥司晨餘寒未斂
禁火方新風輕颺以習習雲密布而鱗鱗垂九霄之嘉
澍飛四野之甘津始觸石以吐液旋彌空而散澤初曳

縷以吹絲繼緣雷而滴墀乍密還疎欲斷又續拂宇披
檐挹川注谷既磅礴而淋漓亦瀾漫而滲漉夏綺埒之
明璣流銅池之文穀木欣欣以向榮草萋萋而如沐若
夫徂畛徂隰是蓂是穠麥漸秀田禾始苗廣地道之
發育資土脈之沃饒雖霑體而塗足幸渥葉而濡條况
乃灌溉神州歲汪赤縣無遠弗屆靡幽不遍灑郊牧而
歡呼浹寰瀛而舞忭慶玉燭之長調喜豐年之屢見夫
惟天地之德廣大無私春生夏長雲行雨施寓栽培於

無意普美利於不知植品物以咸若含細大而莫遺所
以解澤旁皇湛恩深厚覆被民生惠鮮隴畝興有滄於
三陽敷仙霖於千耦世竝享夫豐亨俗咸登於仁壽洋
洋乎造物之弘功予一人乎何有

梧桐賦

撫萬彙之生成攬植物之暢茂見藹藹之梧桐為良材
之僅覲當綺閣而結柯臨玉階而吐秀旣託根以得地
亦含靈而迎候扇淑景於春陽振英華於清晝揚璇璣

樹布葉金鑾碧滋密綴翠纈深攢散澄暉於幃幄濯鮮
色於琅玕被光華於日月耀羽儀於鳳鸞迺有釀雲上
覆瓊泉下浸長浥潤於丹穹永敷榮於紫禁雨滴疎聲
風吹籟鳴乍響迴於環珮已樂合於箏笙若夫新條始
引清露初流如潔清之士邈焉而寡儔挺節無撓陵虛
欲上如謬直之臣介然而不黨拳拳者其陰可以矢卷
阿之頌音離離者其實可以廣湛露之雅什韻虞氏之
文琴絙軒皇之素瑟信天地之嘉生非凡材之能匹彼

夫桃李之佳蔭松栢之貞心甘棠蔽芾於南國王樹青
蔥於上林雖畱詠於在昔詎埒美於斯今至於嶧山孤
立之姿龍門百尺之榦或擢本於丘樊或漸色於巖畔
豈若茲樹之曜穎朝陽植枝霄漢負聳壑之遐標增麗
城之榮觀也哉

弩賦

并序

弩之制昉於有熊氏周禮掌之豪人後世寢失其巧
爰命工人規古遺制而神明之省度悉合迺爲賦曰

觀五材之利用美四弩之超羣法軒轅之大巧象枉矢
之星文闢施牙列樞合機分爾其勢若迅雷形如規月
雪鏃騫騰霜銑激越邁白的神奇埒黃閭之飄忽墜
百石於三連引千鈞於一髮若爾秋原蕭颯春草縈茸
長楸獵馬甫草軍容旣省括而命中亦裂眚而洞宵弋
封狐於巨壑射飛隼於高墉至於魚麗六師龍驤萬騎
羽箭霆鳴雕弧雨厲踰貫蝨以呈能軼穿楊而逞藝彼
夫黑稍朱戟玉劒金鋌或收功於後勁或制勝於中權

雖宣威而克敵未屆遠而乘堅豈與夫夾庾唐大之制
同垂烈於戎旃

夜亮木賦

并序

塞上古木夜視有光遇雨益明移置室中卽之可以
燭物嘉其有異故賦

猗嘉木之迴異垂四照之華英
蜿輪囷於川壤萃盤錯於柯莖
外稟異德內蘊離精煥然夕皎
灼爾宵明晚瑞星之初麗炯壁
月之漸生旣騰輝於山谷亦揚
彩於檐

楹若乃靈根濯雨榮枝浥露芳澤加鮮澄暉遠布方隱
之而彌耀旋即之而如晤洵昭質之無虧何冥行之是
懼爾迺金膏地蕊鶴馥韜光獨飛燦而振采長煜煜以
煌煌吐瓊文於赤水懸瑤景於昆岡非朝華而夕謝殆
積闇以能彰於是列之桂宮置以椒室流映金鋪近燭
綃帙豈浮豔之為容亮靈奇之足述庶含章之可貞雖
在野而靡失

西苑芙蕖賦

惟澤芝誌於爾雅菡萏詠於風詩繫金塘之麗草允柳
沼之朱儀夫其的爍輕莎翩躑清瀨玉節蟠根翠羽褰
蓋縷黃作鬚跗紫成蒂蔭太液之漣漪蕩昆明之霧靄
爾乃幽房晨折芳葩夜舒前迎丹殿後匝瑤除高披直
道斜壤周廬萋萋川碧淼淼天虛光留錦鷺陰曖文魚
葉漾珠而錯落影翻月而軒渠若夫黛暈如烟華濃似
綺藻采橫洲霑雲被沚或雪沁瓊英螺含碧蘼桃倩紅
敷菊分金蕊競秀揚輝爛兮出水如仰如俯似低復昂

亭亭交倚田田並將宛若瑤林之四映矯如朱鷺之載翔
至於萍合橋痕蒲牽波縠溪靜禽喧臺高樹複梅雨滴
而浮馨麥飈扇而散馥氤氲於講席之書郁烈乎侍臣
之服間命沙棠之楫駕芙蓉之舟似塞華峰之種無待
汾水之謳宴羣工於在鎬聊悅豫以凝旒蓋其擢素挺
生拔泥不滓外直中通花榮實旨潔比高人清同君子
是以廬山則淵明屈焉濂溪則惇頤樂只余願賢士之
釋荷裳乃睠幽姿而不自已

松賦

猗歟喬松鍾靈上苑柯百尺以如拳蓋千年而欲偃散
積秀於蓮峰蔭孤芳於蘭畹標豔冶之不矜抗風塵其
獨遠若夫盤根泰岱聳幹匡廬涵貞溫岫映彩嵩衢比
德則質符君子授秩則名榮大夫三眠遜其勁節百木
讓爲仙株爾其綠玉抽鍼黛蛾攢葉夭矯虬鱗騰蹕龍
鬣謾離羣森森爽睫碧駕嶧桐翠增堯莢至十圍翁
鬱連抱龍從濤乍驚而疑雨聲旣遠而猶風弘景聞之

於牖北陶潛撫彼於籬東更若招柏爲朋呼筠偕響白
兔頻遊青牛時往蘿蔦旁牽芝苓暗長落氛霧於瓊堦
藹菁蔥於書幌或俯垂紫磴或斜倚清池鷺獨蹇而啄
實鶴載舞而巢枝日騰照兮光蔚薈月流素兮陰紛披
繫符丘之神王羌倥傯所心怡是以茂姿式詠於雅詩
貞修表揚於戴禮箕山則棟欲生雲石室則脂堪作餌
非幽品之可懷曷詳美於圖史至若皁衣迎氣白草迷
煙雪霏千里冰凝萬川橘柚罷色杞梓藏妍獨斯樹之

不改歷歲寒而蒼然涼颼至弗移其操
涸陰積彌著其堅信國家之楨幹而表德者所取焉

玉泉賦

若夫天產瑰竒地標靈迴融則川流峙惟山靜撫風壤之清淳對玉泉之幽靚信芳甸之名區而神臯之勝境也爾其洞壑屢屢巖阿叢複源出高岡溜生寒麓瑤竇濺珠瓊沙歛玉控以翔螭引之鳴瀑初噴薄以飄絲旋滌洄而曳殼旣澆滑於澗谿遂渺瀰於陵陸侔色則素

纈無痕儷質則纖塵不屬挹味則如醴如膏揣聲則爲
琴爲筑於是長輸遠逝澶漫演迤曲之爲沼渟之爲池
拭一泓之明鏡瀉千頃之琉璃排玲瓏之雁齒跨蜿蜒
之虹髻拓澄湖而西匯環仙籞而東馳當其春日載陽
惠風潛扇草綠初芽柳黃欲綫捲百尺之湘漪拖十重
之楚練蔭遠樹之芊緜泛落英之蔥蒨及夫長羸屈節
新漲平堤林霏夕斂嵐彩晨飛抽碧筍以徐引綴丹的
以紛披展含風之翠葆褰裛露之紅衣若乃炎歊旣回

鮮飈疎豁冷冷桂間嫋嫋蘋末見鳬鴈之沉浮望煙雲
之出沒掬皓魄於晴瀾散清暉於深樾至於淒辰中律
水樹蕭騷木葉盡脫微霜始飄耿氷雪以流映擁貞萋
而後凋攬六宇之曠邈寄余懷於沈寥是其爲狀也何
時不妍何妍不極境近心遠目營神逸有林垌之美而
無待於攀躋有亭榭之安而無勞於雕飾豈所語於入
華林者擬濠濮之遊涉太液者象蓬瀛之域也耶

行殿讀書賦

并序

東巡十有餘日矣寒夜初永行帷清肅取大易尚書
及前代史籍探索披覽夜分乃休侍臣高士竒每以
過勞爲請然朕勤政愛民之外惟涵泳乎詩書心契
古人寤寐勿倦非此何以自樂耶乃作行殿讀書賦
以示之

紹

三后之令緒兮撫曩代之遺蹤爰省方而設教兮言時
巡於充東軫予懷於節屋兮息予駕於蒿宮發圖書於

行笈兮窮墳典之淵通
遡帝王之餘烈兮勤效法之深衷
昔唐虞之詢岳兮闢四門而明目
禹泣罪而下車兮湯解網以致祝文
獵渭以求賢兮武邁邦以問俗
景列聖之芳模兮晞千秋之懿躅
庶咸五而登三兮亦覲光而式穀
惟時商秋甫謝寒律初尋
風日高肅雲物蕭森
陳羽衛之清約兮憩帷宮之靜深
愛三冬之暇景兮惜萬幾之餘陰
於是心曠神怡氣恬神攝
玉蚪畫嚴銅螭宵歇
望山海之崇深兮凜載登而載涉
詎博洽之自矜

兮何菁華之足獵鄙虞初之屬車兮陋河東之遺篋
文教之永敷兮播風聲而四浹

竹賦

并序

江南修竹成林森如綠玉見輒愛之昔人所以歌君
子也每行閒暇偶作賦曰

攬嘉生之植物美修竹之嫵媚振歲莖以擢地結蒼翠
而參天吐碧鮮於原隰含玉潤於山川拂丹霄以煥采
濯晨露以增妍爾其體本貞堅性惟高子欸欸虛中亭

亭秀越居遠俗以無塵生自然而有列游必集於鸛鸞
色不渝於霜雪抱君子之德生豈凡姿之可埒至於汗
青爲簡截管成聲文章彬郁律呂和鳴流兩間之元化
開萬古之菁英亦有蕩材敷布箭括叢生鏃礪作器規
矩中程或垂美於九府或程能於五兵斯其爲致用之
廣遠尤不可以一得名也至若淇澳見稱於衛國夾池
作賦於梁園詠千畝於渭上想一葉於湘潭罔不絕羣
標傑意殊態嚴況爾闕北秋高江南地潔見衆茂之咸

凋知孤貞之自結巨榦凌風修莖映月豈徒覽夫清陰
實興感乎勁節何當植根綺殿布影彤庭彩鸞下集丹
鳳載鳴將曉餐夫珠寶亦暮託於紺莖迺其峭蒨之容
檀藥之美繁條綴青芳筠孕紫散夏景於瑤林蔭春華
於仙沍戛素籟以風疎被青暉而雲委影入戶而窺簷
聲含宮而嚼徵亦足以怡情適性娛目賞心徘徊晨夕
抒寫高吟響蕭蕭而隱几颼颼以開襟披十重之緇
帙鼓五絃之雅琴聊濡毫以成賦寄予思於遙深

闕里古檜賦并序

孔子手植檜在杏壇之側金貞祐間無復存矣元至
元三十年再茁故處明弘治間又燬於火今所遺者
不枯不榮屹立霜露而秀色獨異撫摩久之迺作賦
曰

維槎枿之靈質實鈞化之所鍾標扶輿之奇特峙先聖
之故宮涵元氣以不朽與至道而俱崇爾其黛榦蒼蒼
孤柯濯濯鶴骨初扶霜鱗未作儼茁軋以方舒類鴻荒

之忽鑿謝縟采於春華完淳風於太樸夭矯拂勃星臨
露滴枝無取於樛樛葉全稀於撼撼夕飈度兮弗驚朝
旭烘兮如滌伊間氣之潛滋惟神爽之咸集徘徊延却
宛轉斷連蟠屈兮若侑羽之在列聳削兮若箕簞之待
懸則有築以崇封沃以膏壤方以周闡角以文磔足縮
心歛目給神賞蘿煙奪翠松籟失響於是楷因之而擢
穎著感之而抽莖爭歲蕤於絃誦之里齊扶疎於禮樂
之庭朝菌慚兮一旦大椿讓兮千齡上沂真宰之功遠

契無爲之代均雲行兮雨施等乾始兮坤載疇則出混
茫之中而居耳目之外與三才以竝植縣歷禩其長在
亦有扶桑海表若木山顛東瀛西極揭日摩天迹雖誇
於神異植非出於文宣宜瞠乎其後矣邈無得而稱焉

聖祖仁皇帝御製文集卷三十

欽定四庫全書薈要

聖祖仁皇帝御製文集卷三十一目錄

古今體詩五十二首

元旦

上元

覽貞觀政要

慈寧宮問

太皇太后安

月

昭仁殿

春夜

賜舊時講學

賜撫遠大將軍圖海二首

春日

夜半

琴

晚春遊幸感懷

河

白洋湖

船獵

水村

鄭州河道

喜雨

賜寧古塔將軍巴海詩

并序

橋望

郊外卽事

郊外偶作

馬上口占

複道口占

夏日登景山同翰林張英高士奇作

夜靜讀書

內殿閱馬

夏日同大學士明珠暨諸侍衛過黑龍潭途中
作

黑龍潭

由廣泉寺至臥佛寺

山寺晚景

詠臥佛寺古樹

駐蹕碧雲寺

碧雲寺臨泉望月

碧雲曉起

再賦碧雲曉景

洪光寺盤道

來青軒臨眺二首

法海寺瞻

皇考御書敬佛二字

坐法海寺偶吟

賜聖感寺僧海岫

駐蹕石景山

石景山東望

登戒壇

下戒壇將至潭柘馬上同高士奇聯句二首

潭柘寺偶作

詠潭柘寺竹

石景山望渾河

欽定四庫全書薈要卷一萬三千十三

集部

聖祖仁皇帝御製文集卷三十一

古今體詩五十二首

元旦

廣廷揚九奏
玉帛麗朝光
恭已臨四表
垂衣馭八荒
上元

月華連晝色
燈火雜星辰
彩仗移雙闕
瓊筵會大臣
覽貞觀政要

春陽淑以嘉流雲灑几案及此聽政餘縑緡獲披玩寥
寥三古後載籍亦炳煥俯仰千年餘盛治數貞觀修德
偃干戈措刑空狴犴海外奉車書臣民登燕衍事往迹
尚存流風昭觚翰洋洋四十篇可以一辭貫仁義有明
效非由事擊斷鄙哉封倫言相去邈河漢

慈寧宮問

太皇太后安

定省深宮曙氣催承恩獻壽捧霞杯晨昏敬覩

慈顏豫不盡歡欣踴躍迴

月

影送樓臺照水明
金波蕩漾遠含清
西山色淨雲初散
南苑風和令正行

昭仁殿

雕梁雙鳳舞畫棟六龍飛
崇高惟在德壯麗豈爲威
春夜

玉鑪煙靄盡夜靜百花香
曙氣浮丹陛春光拂象牀

賜舊時講學

几前燭下長談論今日忽爲垂老人憐爾林泉安淡薄
因思疇昔侍楓宸

賜撫遠大將軍圖海二首

兩朝密勿重元臣秉鉞登壇西定秦鐘鼎功名懸日月
丹青事業畫麒麟

其二

威名萬里作長城壁壘旌旗壯遠征綏靖邊陲馳露布

凱旋立奏泰階平

春日

佳氣山川浹地行
物隨節候變初晴
雪消樹底花爭發
冰泮池頭草欲生

夜半

覽書銀蠟短觀象玉衡長
夜半無窮意心爲念萬方

琴

嶧陽桐百尺斲爲鳳凰琴
調絲坐石上宛若松風吟希

音合太古貴以鍊予心

晚春遊幸感懷

岸花芳且落樹木含春光
思賞腸應斷長懷萬古傷

河

春風野水穠花發一道帆
檣帶柳煙影動長橋橫
蟬螭岸鋪芳草近南川

白洋湖

遙看白洋水帆開遠樹叢
流平波不動翠色滿湖中

船獵

萬人齊指處一鳥落晴空攜琴鼓櫂返樂與大臣同

水村

孤村綠塘水曠野起春雲槐柳勝南苑青莎有鷺羣

鄭州河道

藻密行舟澀灣多轉楫頻帆懸風正處煙火近通津

喜雨

暮雨霏微過鳳城飄飄灑灑重還輕暗添芳草池塘色

遠慰深宮稼穡情

賜寧古塔將軍巴海詩

并序

鎮守寧古塔等處將軍巴海豐沛舊臣疆場重寄宣
威布德招徠遠人朕甚嘉焉爰賜篇章以旌乃績

夙簡威名將略雄高牙坐鎮海雲東旌麾到處銷兵氣
壁壘開時壯武功盡使版圖歸化日遠教邊徼被皇風
酬勲世錫丹書重勉爾長思報國忠

橋望

郊原浮麥氣池沼漾青蘋夏日臨橋望薰風處處新

郊外卽事

初蟬鳴暑氣雀噪滿林枝蜂蝶花間舞有情人不知

郊外偶作

乳燕銜泥花影靜鳴鳩喚雨樹林深豫遊不獨題詩意
要識熙熙皞皞心

馬上口占

夏日橋頭望遠山兒童戲水水潺潺煙雲數里方知異

野樹汀花白晝閒

複道口占

深深複道遠停輦問宮官內苑薰風起榴花滿御闌

夏日登景山同翰林張英高士奇作

日暮登山覽八荒翰林隨輦進辭章君臣同樂松陰下
時雨將來入未央

夜靜讀書

九重夜靜御鑪香墳典披觀意味長爲念兆民微隱處

孜孜不怠撫遐荒

內殿閱馬

龍種齊嘶御殿旁
追風逐日似飛翔
躡塵不染凌霄志
箇箇真堪號驪驄

夏日同大學士明珠暨諸侍衛過黑龍潭途中作
駿馬駸駸躡綠蘋
羽旗豹尾映龍鱗
暑中荷鍤方知苦
停輦觀苗問稼人

黑龍潭

暗通山下草流出澗邊花空潭深靜處灑翰動龍蛇

由廣泉寺至臥佛寺

巖邊青竹低臨水雲外嵐峰半入天僧舍無人常寂寂
山門洄繞是寒泉

山寺晚景

岸積青苔厚藤抽紫蔓長徘徊風景異翫賞對斜陽

詠臥佛寺古樹

喬木婆娑陰正肥夕陽相對嶺崔巍薰風拂樹涼雲起

暮景蒼然送輦歸

駐蹕碧雲寺

山寺通幽境鶯啼綠樹枝
旛虹迎玉輦剎鳳駐雲旗
翠麓三乘闢佳辰萬騎宜
松陰輝落景遊豫近臣知

碧雲寺臨泉望月

碧雲夜望月初圓星斗輝
煌照九天滴溜涓涓無止息
此心長使若清泉

碧雲曉起

山中曉起聽蟬鳴遙對峰岑霽色清
洞壑有年奇樹老夢回疑是在蓬瀛

再賦碧雲曉景

夏早日方長南風草木香
清涼飄御扇荒剝得恩光

洪光寺盤道

白雲飛夏日斜徑盡崎嶇
仙阜崇高異神州覽眺殊

來青軒臨眺二首

搖拂煙雲動翠旗登臨翰墨每相隨
山河景象無窮意

俯瞰人情因物知

其二

來青高敞眺神京
斜倚名山澗水清
此日君臣同覽賞
村村雞犬靜無聲

法海寺瞻

皇考御書敬佛二字

重來瞻御筆懷感動心神
丕烈邁前代鴻休啓後人興
文盛禮樂偃武息兵民法則
光華遠千年照佛輪

坐法海寺偶吟

縱目西山宜永日開襟五月似高秋
萬幾偶暇因遊豫期與黎民樂未休

賜聖感寺僧海岫

脩然老衲淨塵緣臺殿參差起瑞煙
馴鴿簷前應受戒遊鱗花下亦參禪

駐蹕石景山

駐蹕荒亭日欲斜潺湲石溜滴雲霞
鸞旗飄動連香草

龍騎驂驪映野花巖洞幽深無鳥跡峰崖高處有人家
青山綠水誰能識懷古登臨翫物華

石景山東望

車書混一業無窮井邑山川今古同地鎮峻嶒標異秀
鳳城遙在白雲中

登戒壇

樓閣高低樹淺深山光水色日沉沉碧墀靜照寒松影
清晝蟬聲響綠陰

下戒壇將至潭柘馬上同高士奇聯句二首

嶺腹層層小徑斜

御製

穿雲陟盡石峪岬

臣高士奇

澗中草屋流泉繞

御製

萬匹龍驤擁翠華

臣高士奇

其二

蟬鳴草木動薰風

御製

蛺蝶雙來引

御驄

臣高士奇時有
雙蝶飛導仗前

潭柘幽深聊駐輦

御製

省方不與豫遊同

臣高士奇

潭柘寺偶作

怡神水樹清襟洽
滿目奇峰入夏雲
微起涼風響萬籟
山中鶯囀奏紛紜

詠潭柘寺竹

翠葉纔抽碧玉枝
經旬清影上階墀
凌霜抱節無人見


終日虛心與鳳期

石景山望渾河

石景遙連漢渾河似帶流
滄波日滾滾浩淼接皇州



聖祖仁皇帝御製文集卷三十一



總校官庶吉士臣侍

校對官庶吉士臣陳

謄錄監生臣朱